

VENDIM
Nr.780, datë 10.11.2011

PËR DISA NDRYSHIME DHE SHTESA NË VENDIMIN NR.804, DATË 21.11.2007 TË KËSHILLIT TË MINISTRAVE “PËR MIRATIMIN E RREGULLORES SË PERSONELIT TË POLICISË SË SHTETIT”

Në mbështetje të nenit 100 të Kushtetutës, të neneve 41, 86, e 129 të ligjit nr.9749, datë 4.6.2007 “Për Policinë e Shtetit”, të ndryshuar, dhe të pikave 1 e 2 të nenit 8, të ligjit nr.9970, datë 24.7.2008 “Për barazinë gjinore në shoqëri”, me propozimin e Ministrit të Brendshëm, Këshilli i Ministrave

VENDOSI:

Në rregulloren e miratuar me vendimin nr.804, datë 21.11.2007 të Këshillit të Ministrave, bëhen këto ndryshime dhe shtesa:

1. Shkronja “d” e nenit 7, ndryshohet, si më poshtë vijon:

“ d) fotokopje të dëshmisë së aftësisë së drejtimit të automjetit të tipit B, e cila, për gjininë më pak të përfaqësuar, mund të paraqitet në një afat kohor deri në 12 (dymbëdhjetë) muaj pas fillimit të shkollës bazë të policisë. Nëse aplikantët nuk e paraqesin këtë dokument brenda 12 (dymbëdhjetë) muajve, lirohen nga Policia e Shtetit;”.

2. Në nenin 19 bëhen ndryshimet dhe shtesa e mëposhtme:

a) Pikat 2 dhe 3 ndryshohen, si më poshtë vijon:

“2. Aplikantët renditen në listën përfundimtare, sipas rezultateve të arritura dhe gjinisë. Kjo listë shpallet publikisht, jo më vonë se të nesërmen e ditës së përfundimit të procesit të intervistimit me gojë.

3. Në varësi të vendeve të lira në Policinë e Shtetit, kandidatët, që do të përzgjidhen, bazuar në listën e rezultateve të arritura sipas rendit zbritës dhe gjinisë, kanë të drejtë të vazhdojnë procedurat e mëtejshme të testimit, sipas nenit 13 të kësaj rregulloreje.”.

b) Pas pikës 3 shtohet pika 4, me këtë përmbajtje:

“4. Minimalisht 50% e kandidatëve që pranohen në polici të jenë nga gjinia më pak e përfaqësuar. Kur në listën respektive nuk ka kandidatë të mjaftueshëm për të plotësuar këtë kuotë, atëherë realizohet një fushatë e re pranimi vetëm për gjininë e nënpërfaqësuar.”.

3. Në nenin 50 bëhen këto shtesa e ndryshime:

a) Në pikën 2 bëhen shtesat dhe ndryshimet e mëposhtme:

- Pas nënndarjes “iv” të shkronjës “a”, shtohet nënndarja “v”, me këtë përmbajtje:

“v. Të ketë përfunduar shkollën bazë të policisë.”.

- Nënndarja “iii” e shkronjës “b”, ndryshohet, si më poshtë vijon:

“iii) Të shpallet fitues në testin me shkrim, intervistën me gojë, si dhe ushtrimet vlerësuese.”.

- Nënndarja “iii” e shkronjës “c”, ndryshohet, si më poshtë vijon:

“iii) Të shpallet fitues në testin me shkrim, intervistën me nivelin drejtues, si dhe ushtrimet vlerësuese.”.

b) Nënndarja “iii” e shkronjës “a”, të pikës 3, ndryshohet, si më poshtë vijon:

“iii) Të shpallet fitues në testin me shkrim, ushtrimet vlerësuese, si dhe në intervistën me nivelin drejtues.”.

4. Shkronja “dh” e pikës 2, të nenit 53, ndryshohet, si më poshtë vijon:

“dh) Vlera e rezultatit të testit me shkrim, si dhe e rezultateve të fazave të tjera të testimit në raport me rezultatin e përgjithshëm të kandidatit përcaktohet nga drejtori i Përgjithshëm i Policisë. Rezultati i testit me shkrim, në asnjë rast, nuk mund të përbëjë më pak se 60 % të rezultatit të përgjithshëm të kandidatit.”.

5. Në nenin 54 bëhen këto ndryshime:

a) Pika 2 ndryshohet, si më poshtë vijon:

“2. Kandidatët, që kalojnë testin me shkrim për ngritjen në grada, nga “Kryeinspektor” deri në “Drejtues”, ose ushtrimet vlerësuese për ngritjen në grada, nga “Kryekomisar” deri në “Drejtues i parë”, njoftohen të marrin pjesë në një proces vlerësimi për:”.

b) Në fund të pikës 4 shtohet fjalia, me këtë përmbajtje:

“Në përbërjen e komisioneve të vlerësimit mund të caktohen dhe persona, jashtë strukturave të Policisë së Shtetit.”.

c) Fjalia e fundit e pikës 5 shfuqizohet.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha